



Na osnovu člana 22 Statuta Brčko distrikta Bosne i Hercegovine (Službeni glasnik Brčko distrikta BiH, broj 2/10 - prečišćeni tekst) i člana 64 stava 3 Poslovnika o radu Skupštine Brčko distrikta Bosne i Hercegovine - prečišćeni tekst (Službeni glasnik Brčko distrikta BiH, broj: 54/18), te

Razumijevajući da razvoj Brčko distrikta BiH i svih njegovih građana direktno zavisi od njegove sposobnosti da se što brže modernizuje,

Svjesni da je digitalizacija najznačajnija pretpostavka i sredstvo modernizacije naše zajednice,

Apelujući na sve političke faktore da prioritet u svom političkom radu stave na pitanja budućnosti, modernizacije i civilizacijske transformacije,

Čvrsto opredijeljeni da svoju zajednicu beskompromisno i na svim poljima i zaista uvedemo u dvadeset i prvi vijek,

Mi, poslanici Skupštine Brčko distrikta BiH, na I. nastavku 41. redovne sjednice održanom 27. februara 2019. godine, donosimo

DEKLARACIJU

O UNAPREĐENJU INFORMATIZACIJE BRČKO DISTRIKTA BiH

1. Brčko distrikt BiH će svoj institucionalni, ekonomski, obrazovni i društveni razvoj bazirati na procesima digitalizacije kao preduslovu za priključivanje razvijenim zajednicama.
2. Brčko distrikt BiH će svoju kompletnu javnu upravu digitalizirati, odnosno implementirati će koncept „e-uprave“. To znači da će svi upravni postupci biti vršeni *online*, da će doći do maksimalne moguće uštede vremena i novca kao resursa, odnosno da će efikasnost, transparentnost i ekonomičnost rada uprave biti na maksimalnom, a mogućnost zloupotreba, proizvoljnosti i korupcije na minimalnom nivou.
3. Brčko distrikt BiH će kreirati pametnu, brzu i prilagodljivu „e-vladu“ koja će u budućnosti da održava ne fizičke, nego „e-kabinet“ sjednice, čiji je cilj da smanji vrijeme koje se troši na fizičke sastanke i procedure, a da ostavi više vremena i resursa za donošenje strateških odluka. Zadatak „e-vlade“ će biti da neprestano pronalazi mehanizme kako da digitalizira svoje servise i usluge, odnosno kako da ih nudi ne samo građanima Brčko distrikta BiH, nego i svim drugim građanima koji ispunjavaju preduslove određene zakonima Brčko distrikta BiH, a sve s ciljem pronalaženja novih, kompetitivnih i inovativnih mehanizama za povećanje prihoda Brčko distrikta BiH, te njegovu sveukupnu modernizaciju i ekonomski napredak i blagostanje.
4. Brčko distrikt BiH će putem „e-uprave“, „e-poreza“ i „e-pravosuđa“ da kreira najpovoljniji fiskalni ambijent u regiji, s najnižim stopama poreza, s najmanje predviđenih fiskalnih i parafiskalnih nameta, kao i s najjednostavnijim procedurama za plaćanje poreza, uporedo s e-registrom privrednih društava i *online* registracijom istih, u zakonskom imperativnom roku od tri dana od dana slanja urednog e-zahtjeva za registraciju, a bit će realizirani i implementirani i koncepti „e-obrazovanja“ i „e-zdravstva“.

5. Predmet informatika bit će uveden u osnovne škole počev od prvog razreda, a oblast programiranja počev će se izučavati počevši od trećeg razreda osnovne škole.
6. Brčko distrikt BiH će izvršiti reformu kompletnog obrazovnog sistema koji će, u svim oblastima obrazovanja, pored edukativne, dobiti i svoju tržišnu komponentu, a sve u saradnji i harmonizaciji s poslovnom zajednicom.
7. Bit će izvršena kodifikacija i unifikacija različitih grana prava (građansko pravo, privredno pravo, upravno pravo, krivično pravo), radi lakšeg snalaženja u mnoštvu pravnih propisa građanima, privrednicima, investitorima, ali i sudijama, tužiocima i stručnoj javnosti uopšte.
8. Zadužuju se Vlada Brčko distrikta BiH, sva njena odjeljenja, ustanove i drugi organi i institucije, kao i javna preduzeća i fondovi, da u periodu od šest mjeseci dostave Skupštini Brčko distrikta BiH na razmatranje konkretne planove provođenja ciljeva zadatah u ovoj deklaraciji.
9. Zadužuju se nadležne komisije u Skupštini Brčko distrikta BiH da u periodu od šest mjeseci pripreme analizu postojećih zakonskih rješenja, a kako bi se odmah potom moglo početi s realizacijom ciljeva zadatah u ovoj deklaraciji, odnosno kako bi se izvršile što hitnije izmjene postojećih i donijela nova zakonska rješenja u pravcu implementacije tih ciljeva.
10. Zadužuju se predstavnici izvršne i zakonodavne vlasti u Brčko distriktu BiH da u roku od šest mjeseci od dana donošenja ove deklaracije stupe u kontakt s predstavnicima političkog i privrednog sektora u onim zajednicama koje su uspješno realizirale ciljeve navedene u ovoj deklaraciji, a kako bi se analizirala mogućnost njihove pomoći institucijama Brčko distrikta BiH u provođenju ciljeva zadatah u ovoj deklaraciji.
11. Zadužuje se Skupština Brčko distrikta BiH da po isteku rokova navedenih u ovoj deklaraciji pripremi detaljan izvještaj o tome koja odjeljenja, institucije, fondovi i javna preduzeća su uspješno realizirali zadate naloge, a koji navedeni subjekti to nisu učinili.
12. Deklaracija stupa na snagu danom donošenja, i objavit će se u Službenom glasniku Brčko distrikta BiH.

Broj:01-02-541/19

Datum: 27. 2. 2019. godine

**PREDSJEDNIK
SKUPŠTINE BRČKO DISTRIKTA BiH
Esed Kadrić**

Dostavljeno:

- 1) Predsjedniku
- 2) Dopredsjedniku
- 3) Gradonačelniku
- 4) Glavnom koordinatoru Vlade
- 5) Pravosudnoj komisiji Brčko distrikta BiH
- 6) Skupštinskim komisijama
- 7) Policiji Brčko distrikta BiH
- 8) Kancelariji za reviziju javne uprave i institucija Brčko distrikta BiH
- 9) Komisiji za papire od vrijednosti
- 10) Direkciji za finansije
- 11) Razvojno-garantnom fondu Brčko distrikta BiH
- 12) Zavodu za zapošljavanje Brčko distrikta BiH
- 13) JP „Luka Brčko“ Brčko distrikt BiH
- 14) JP „Komunalno Brčko“ Brčko distrikt BiH
- 15) JP „Radio Brčko“ Brčko distrikt BiH
- 16) JP „Putevi Brčko“ Brčko distrikt BiH
- 17) Fond zdravstvenog osiguranja Brčko distrikta BiH
- 18) JZU „Zdravstveni centar Brčko“ Brčko distrikt BiH
- 19) Sektoru za opšte poslove i strateško planiranje
- 20) Arhivi